

安徽省石埭縣志

乙亥翻印本

地=230.141  
32.1  
部=1~4

2

1600

石埭縣志序

古今紀載之大者曰經曰史曰志志之大者莫若職方輿地一統諸書至若蒐考故實網羅遺逸之功則史官不能具悉必且以其事徵之牧伯牧伯徵之州郡州郡徵之邑長吏而後採訪始備參訂始詳是故邑之有志志之權輿也然今日之長吏留意於斯者蓋亦鮮矣埭邑姚侯爲東粵名宿文章治行卓著江表視事十餘年政成化洽孔爾興歌會天子銳意文治詔直省府州縣各脩厥志侯乃與邑之荐紳士取舊志掇拾纂輯補缺略訂舛訛孜孜早夜無或敢忽居一年志成噫侯誠有功紀載哉夫士君子游宦所至無論地之大小皆

石埭縣志

序一

一

當有著述不朽以待後人俾千載而下沿革廢置歷歷皆在吾目而生乎我後者亦得以知我今日此昔之人所由勒銘於山沉碑於淵以防陵谷之遷變也埭邑雖蕞爾其地視古小侯國江山襟帶疆土肥瘠風俗升降租調多寡與夫名公巨卿所發迹賢人烈女所鍾英高隱大德所往來棲息錯出迭起代不乏人昔我先世君輿公諱輅者唐咸通進士授長林令避黃巢亂徙居茲土積德基行子孫蕃衍遂爲邑中著姓余嘗閱家乘而嘆息前志之缺漏今幸得補葺以垂永世且舊志修於明神宗時今復八十禩矣此八十年間風移世變豈無足光史冊而示來茲者其待侯以表彰又不知凡幾也甚矣侯

之有功紀載哉我江南十四郡州邑計百十有奇其克依期限採纂成篇蓋不數數見夫豈無博學好古著作之才歟良由簿書期會鞅掌卒瘁雖欲與學士大夫考訂今古網羅舊聞而勢有不逮惟石邑姚侯專心肆力以早竣厥事余讀斯志又不禁慨然嘆吏治之不易而深幸姚侯此舉能爲諸郡邑倡也是爲序賜進士及第通議大夫詹事府少詹事兼翰林院侍講學士加一級華亭沈荃撰

### 石埭縣志序

石埭姚侯六康先生作縣志既成數年以示予屬序余曰序旣斐然盍已諸侯命至再客有善之者曰埭無志志蓋自侯始也前此洵無

### 石埭縣志

序二

二

志乎曰有之前志荒以闕今志雅以該草創者艱始踵成者美備也黃侯蓋起嘉靖丁未熊侯應禋繼之以萬曆甲辰今上康熙之乙卯則姚侯蓋有事於志者三人相距各六七十餘載至是始井井成一書故曰自侯始也縣肇置梁大同間隸宣城郡後省入南陵秋浦相傳唐永泰二年復置縣在今縣治西百四十里其徙治陵陽沿革湮晦已同郭公夏五之疑况兵興世變百度更始賢人軼事闕而不彰能不傷無徵於文獻哉海內以志乘稱者數家近推海鹽志最名余觀其書初同姚叔祥采輯一二而卒總定於胡孝轅之手兩閱歲卒業志蓋非濫作也夫左國同時不相通襲馬班一史各見異同使聚

此四賢濡毫接席共撰一編將斷斷乎不相下矣故詢考博則罔私  
綜斷專則罔亂志傳簡嚴則不穢編校遲久則不駁以蕪舍是四者  
即有三辰亡裨也今之爲志者不然州縣憚供筆札督辦旬月人不  
相習異喙爭鳴分曹畢務則委局雲散不竣檢貫長吏刺促文漫不  
暇省胥抄簡錯增竄乖陋繇是志逾修而逾壞余嘗序安福縣志極  
論之近歲與修吾郡志而書成輟序有噤不敢言者益歎此事之難  
也姚侯以經術佐吏事積書爲屋齋居夜讀如儒生旣新孔子廟葺  
陵陽書院率諸生講德考業且收耆舊文學之彥八廨舍與共晨夕  
故其爲是志也逖聽周觀發幽補闕佳傳不煩造請富人 not 挂名氏  
石 埭 縣 志

序三

三

磨礱筆削再歲成編蓋其慎也語云鑒水辨形鑒古知今侯官子明  
仙令之區慕文翁陽城之政多循蹟其大者如祛催科六弊上書大  
府請減蕞爾邑供億重困民賴以紓又出稱貸之錢卹灾祲掩骼  
父老有流涕者後之君子取法當於是而侯所自叙猶皇皇於作吏  
之不德也於戲是可以見侯志矣康熙戊午清和月下浣之吉宛陵  
年通家治弟施閏章拜撰

### 自序

志者識也一統志識四方之概一邑志識一邑之概雖大小不侔而  
綱維包舉哀次論列參之以衆裁之以獨則同條而共貫也埭故有

志略而弗詳自萬曆甲辰熊侯修之距今七十餘載莊初視事展讀喟然即欲采摭編纂紹繼前徽日不暇給數年來稍稍弊剔利興綱舉目張會國家修一統志詔直省郡邑各修志以上又頡河南省新志爲天下式莊始進邑之大夫士暨耆老而告之交相踴躍樂於從事謂舊志多蕪略板帙殘缺中際滄桑又復興革互異失今不修漸至文凋獻謝杞宋無徵乃擇吉告於先師廟開局城南古刹敦聘鄰封及邑之碩彥或驅四車出或簪筆同堂博采旁求和衷共事而莊不敏以簿書之暇竭其一得共佐鉛槧閱二朞迺訖厥功子莊於是作而言曰志之役大矣哉埭雖蕞爾舊志具在顧山川阨塞謠俗奢

石埭縣志

序四

四

儉不無今昔之殊戶口物產之贏縮官師先後之去留郵亭驛館增損之以時坊表祠宇興廢之以漸且夫田賦之由輕而重也力役之由簡而繁也儒紳冠蓋之日盛也忠孝節烈之代興也碑版著述之月異而歲不同也一時有一時之足識數十年有數十年之足識茲幸與二三同志續成掌故縱網羅未廣而考據不誣辭藻未工而外訛頗訂觀風者可披籍以尋徵事者可按圖而索燦如夏鼎炳若周車奚必過郊子而問官歷襄陽而訪舊也乎昔子長作史記往往稱行遊所至得之某某傳述陳龍川序宋季人物亦歎四十年以來之事幾不可問蓋紀載殘闕自古爲患今踵熊侯而再修以仰副一統

志之功令庶不憂中墜也已雖然莊亦志中一人耳束髮受經輒慕文翁陽城之爲治茲且待罪十年朝夕黽勉循名責實雖興學校勤考課革羨餘清欺隱禁器訟糴粟賑饑買山掩骼似欲厚民生而正民志然綆短汲深閭閻尙少蓋藏風氣未還淳古則以莊耳目心思所及者寡而所遺者多是不德之所致也然則一邑之大槩莊得而識之而十年之負過埭之人亦皆得而識之矣時康熙十四年乙卯仲秋月上浣之吉知石埭縣事嶺表姚子莊拜手撰

### 石埭縣志序

今之廣教化勵風規興廉舉孝者大要期天下之縉紳士庶鼓舞勸

### 石埭縣志

序五

五

勸各盡其性分之道毋爲一身碌碌無聞而已夫縉紳士庶既有廣勵興舉之功而人文風習必至於蔚起此皆山川間氣之所鍾遂成天壤不朽之事業豈不偉哉第恐時異世殊典故殘闕致事業漸滅而不可考所以國有史家有乘邑有志則邑志之不可以已也使有志矣能備乎數十載以前不能備乎數十載以後則隨時修訂之不可以忽也埭雖僻壤山川之清麗人物之都雅忠孝節烈功績文章與夫掇巍科膺顯秩者代不乏人凡志於前者燎如指掌迄今七十七餘載人物之凋謝志書之魯魚芳躅杳然爲之悼嘆汲汲乎期其繼往開來者出焉茲幸梁化姚侯下車十年來扶風改俗崇正革弊如

文翁之化蜀常袞之化閩其間人文風物一時崛起惟邑志荒唐文獻之不足徵何以廣勵興舉邪侯毅然任其纂輯攜拾逸書博采遺事皆出自手裁不欲苟爲去取行將編次成帙越一歲奉聖天子詔天下郡縣修葺通志益嘆服侯學優才裕已於茲有先見者也復遵所頒式精核完善歷五載而成書八卷其輯錄者則九華甯子訂正者則雲間陳子較閱者則邑庠蘇畢沈陳諸子體元愧不敏亦藉爲從事焉侯捐俸鑄刻成一代之鴻章奕禩之文獻也所謂不朽之事業顧不重且大歟體元躬逢其盛舉何可無一言附於篇末是爲序

時康熙十五年丙辰季秋月九日石埭縣儒學訓導山陽周體元謹

石埭縣志

序六

六

識

石埭縣志叙

稽古唐虞之世任土作貢鑄鼎象物姬公之保釐成周也周禮一書凡紀綱法制人官物曲之能無一不備以知古聖王治天下之道必有章程法式燦然昭示而後遵守者有訓行式從之美而無愆忘踰越之患是故國有史郡邑有志雖大小相承繁簡互異而其考訂得失釐定典章以激勸當世風示來茲有關治道人心其義一也我埭爲古揚州之域地僻民淳俗簡樸而謹厚山川固多勝跡代傳不乏偉人然歷來分屬靡常沿革不一故前志亦多不可考明之萬曆甲

辰先輩少保畢公與縣父母熊公會爲修輯越今日七十餘年矣滄桑變遷其所謂昔是而今非者不知凡幾前存而後廢者不知凡幾其版圖戶籍淪於奸豪亂於胥蠹者不知凡幾而且清風高節賢人碩士可以廉頑立懦不及表章者又不知凡幾余怒焉念之久矣會嶺表六康姚侯來蒞吾邑侯固海南名宿也以羅浮仙子之品踵竇宰分符之地新饗宮修雉堞恤寒士賑飢民善政未易更僕數致一時改觀百廢日舉遂毅然以爲己任戊亥之間余以讀禮家居時承下問不禁慨然曰立綱陳紀分土定民以及旌別彰瘝皆古聖王勵世磨鈍之權埭雖一邑其間山川之秀麗人物之瑰奇爲斯世所推

石埭縣志

序七

七

慕者多矣土田之肥饒人民之煩衍供國家所輸將者衆矣迺令事與時移人隨世變湮滅不張雜亂無稽可乎夫文獻無徵夫子傷之今日之志正存亡絕續之時也第恐非一手一足之烈於是集邑之譽髦若而人四方名流若而人以及余仲弟汝霑廣搜故帙博採舊聞上必稟程於國典下亦不遺於里巷歌謠稗官野史之細朝夕訂正旣條分而縷析亦涇經而渭緯閱二載而志迺成以予里人遂欲予言爲序予向與侯同志今樂觀厥成不敢謝不敏而又見斯舉也刪繁就簡踵事增華文不傷靡質不失實其與人也恕而嚴其核事也詳而確蔚然令埭之聲名文物光於一時昭於奕世能不以一言

歸功於侯而爲我邑誌慶也哉夫政以人舉事以會集以數十年迂闊難爲之業侯出而行之行之而得所指歸犁然成一代典章是亦國家昌明之運所由啓豈特一邑之民是矜是式行將懸之國門採風之使取以備柱下之選可矣是爲叙時康熙乙卯歲孟夏賜進士出身署廣西布政使司布政使事提督廣西通省學政按察司僉事加一級里人鶴洲蘇汝霖頓首書

### 舊志序

予嘗縱觀天地間有能有不能有變有不變天有時地有氣材有美工有良兼而有之者厥惟艱哉比而同之亦惑矣是故石有時以泐

### 石埭縣志

序八

八

水有時以凝橘踰淮而北爲枳鸚鵡不踰濟鄭之刀宋之斤魯之削吳越之劍遷乎其地弗能爲良夫物則亦有然者矣况人乎知此可以商古今確事變况一邑之產目前之近乎初予來尹茲土即覽山川之勝相風土之宜究人物之性蓋曲成化裁亦治體之要者及觀舊志版籍弗存漫無所考乃役耳察情役目察形得於聞見僉謂曰志可修矣予曰魯隱治淺而急急要盟春秋非之按輿紀實非得是時不可難始事也越二年廢墜粗舉氣淑人和而情僞形象於時洞見僉謂曰志可修矣予曰鄭國辭命更四賢之手乃爲盡善按輿紀實非得是人不可難成事也既而考蹟有賢士大夫修辭有賢師儒

而志可修矣乃以其事聞於臺院龍池唐公可其請時月而志告成矣僉謂鑿序其端夫燕無函秦而廬天之生材雖有方域然天不愛道地不愛寶不借材於異代古有成論是故有能有不能者天也有變有不變者地也能其不能變其不變者人也此志之所由作也昔者職方氏掌天下之圖辯九州之域而曰周知其利害則夫興利除害不有關於此舉哉蕭何取秦圖籍而天下阨塞民情土俗於時具見當時三章之約達民情也沛上之歌觀民風也志顧無所裨耶是故志弊思滌志利思興志物宜見有相之道焉志人物見曲成之仁焉而政治胥此焉出志之作夫豈徒哉古人有不出戶而知山川爲

石 埭 縣 志

序九

九

秀才而知天下事者執此以往推之天下之志可知也春秋魯史耳而亂臣賊子懼志亦一邑之史也而勸懲寓焉推之作史之意又可知也志之作夫豈徒哉與茲選者尙相與勗之哉茲役也討論者邑人李忠桂時芳施容陳秋芳也草創者訓導馮光浙劉文舉也修飾潤色者鑿也嘉靖丁未知石埭縣事贛縣黃鑿撰

舊志序

夫志史也國有史邑有志所以闡紀法列政教明臧否別淑慝存旣往以垂將來者也國無史無以爲國邑無志無以爲邑雖有大小之分而其所繫之重且大則一也石埭古丹陽郡地疆域儉於東北而

延袤於西南不滿四五十里最爲狹隘歷代分屬靡常入我明爲畿輔切近之邦嘉靖戊辰己巳始議築城以奠民居夫以小邑而得附畿輔又有新城百雉之固吾隸之所遭亦榮且幸矣初侯之銜命而來也亟取邑志覽之曰政之體要存焉吾非徒簿書案牘瑣瑣者之是務也旣而思躬行取信文飾何爲吾徐俟其成以圖之焉已爾於是首議崇黌校端風化革取里甲之供應不到公庭禁絕吏胥之科索毋詣村落諸凡戶口賦役水利刑獄之類利所當興弊所當厘者罔不次第舉行至誠所感上下交孚有一塵不染諸務兼收之謠則又曰志亦典章文物之攸係是不可以已者夫然後將舊志蒐輯校

石隸縣志

序十

十

閱採訪謀諸孝廉桂子應蟾等而裁定則獨任其責因革筆削詳審慎畏舉其大不遺其小纂其要復芟其繁森然成一家之史謂予里人以序請予惟凡志之作其道不外於天以星辰分野地以山川建國人以文獻經世斯三者統之爲三才散之爲萬事萬物傳之爲百千萬代故唐虞之以齊七政神禹之以成賦九州孔子之以敘述六經皆其事也則亦莫非道也侯自平日擬議踐履見聞之所得與心思之所至以運量於其間是故觀于其志體式雅正詞旨莊嚴簡而且核質而不俚事與道咸備足以準古信今而傳後無疑也君子惟考究會通而勿煩于旁求斯得之矣萬曆甲辰邑人畢鏘撰

舊志序

夫志有自來矣直志其山川土田名物已哉無亦志所爲疆理奠安  
宜民作人之術而寄其心於不窮乎藉非按籍求心時異事遷是今  
非古一二掌故之策且不足托於稗官野史之後矣埭舊有志絲嘉  
靖丁未泊今歲邈諸凡官府章程文物民風變態卽如建城塹丈氓  
田諸大役弗載識者歎零星我熊侯牧茲五載餘百務聿修猶深慨  
然於文獻之久無徵也遂命余諧諸生類集而手自校論稽山川之  
壯畫建置之雄表官師之賢記人物之盛標名節之垂崇文章之雅  
至於民艱士行尤惻然而有餘悲憬然而不容口剖析病源敷陳化

石埭縣志

序十一

十一

理若鑄鼎以象形置范以陶物用鑑以別形訪之於衆蹠之以實而  
至於去取悉斷以已蓋於案牘承委之間曲盡夫聽采問察之道淵  
哉侯之心爲埭計至深遠哉是猶未足以盡之也吾埭風俗古稱醇  
愿迨今公私漸靡日就巧敝侯率以簡靜敦以廉朴庶幾返及其初  
嗣是可畫一而治獨計川以珠而媚山以玉而潤地以人而重埭若  
唐之杜公彥之宋之王公時可丁公文伯今之畢公廷鳴後先蔚起  
代稱名賢第仰心多而紹武匹休數百年才一見豈地畫之水積不  
厚則負大舟無力風積不厚則負大翼無力意者培之振德厚積化  
成責固有對待而興者豈盡凡民耶斯志也前人彰美以俟之後後

人傲盛以質之前其必有以多才鳴國家之盛而下邑爲海內之望者倘是又侯無窮之心乎於斯志爲益有光矣萬曆甲辰歲孟夏之吉鄉進士邑人桂應蟾敬書

重修石埭縣志書徵事引

吳郡圖經賴樂圃而再輯成都雜記藉居正以重臚既有作於前可無述於後時雖有待責惟在人石邑溪水灤河山巒拱揖向號神仙之窟夙成志乘之書爰自前朝萬曆甲辰復經邑侯熊公修舉屢週星齋矧屬滄桑獻日凋則文易湮歲閱久而事難核若非白頭宮女誰說開元倘乏皓首秦官疇咨柱史興除沿革恐漸同秦嶽之碑文物官師慮不免郭公之牘良深惋歎敢後編摩費宮經始於聿新邑志殊難於踵舊子莊東帶濫竽治慚片善操觚授簡才遜三長會鶴州老先生讀禮寢門具有同志值善長名博士貽書文學罔不協心

石埭縣志

徵引

十三

繼義例於貫珠弗憂墜地共參謀於築舍或視迂圖惟祈闔邑紳士碩耆念志與史並重修與創同功詎言劬謝虞初務旁搜而博訪寧止記同荆楚須攬秀以披華野有遺民齒牙尙能譚故事家傳祕笈發抒應不吝名山於以刪繁去蕪妙染中郎斑管綴殘補闕光騰側理名牋續成憲於七十餘年備徵實於百千萬禩不亦休乎幸互勉之

知石埭縣事嶺表姚子莊啟

石埭縣志書凡例

一石埭設邑爲最古其間建而廢廢而復建自漢以迄宋元所轄幅員廣狹與城郭基址半屬傳疑而人物事蹟竟無一傳紀載之闕未有甚於此者前朝成化始創立志而嘉靖丁未一修萬曆甲辰再修然皆僅存其意未及旁搜遠討迄今修合而爲三去古愈遠考溯愈難因陋就簡寧無滋媿

一神廟甲辰修志而後垂七十餘年况中際滄桑事變尤多若不亟纂輯必致放失無傳乃數十年內襍祥徵應人物息耗賦役重輕規制損益以及孤芳亮節逸事遺文搜採寥寥如隔數世洵可歎

石埭縣志

凡例一

十四

也蓋平昔既無學士大夫筆之叢談而一時又乏故老遺民足諮故實故網羅三載僅什之四五非云大備聊紹薪傳

一前志內如嘉隆年間事近而可徵乃官師失其履歷節婦不書壽終職官邑紳不顯著其卓行大節僅於名下獎借數字豈足核實而示信乎故可稽者則益之無可稽者則仍之

一志雖與史類而稍有別史備淑慝而志則主善善史著列傳長篇而志則彙括大概此體也例也若夫近代芳躅雖月旦已昭猶需事久論定方得載入不敢遽徇所請取譏識者

一節令氣候兩廡姓氏事關鉅典故前志之軼者則補之城安八景

優老義官事無足取故前志之刪者姑仍之至巖谷之勝古蹟之遺問有一二增入而傳疑襲譌亦頗有所考焉

一隸邑山多田少地瘠民貧賦役繁重閭閻疲於奔命邇來軍需百出尤全書所未載者職司百里軫念民艱故於賦役諸弊極力釐剔向當軸縷縷痛陳幸已去其太甚尙有申請未及而民隱攸關者著爲芻議以俟後之良牧覽而采擇以甦萬一之困

一詩文記傳年代久遠從前散逸無從搜補子莊蒞隸十載名賢至止題詠頗增十之四五隨手編入用光文獻其中時地爵秩多有

錯次觀者亮之

石隸縣志

凡例二

十五

一是志爲綱者八下皆以類從之庶便觀覽然區識鄙論適足爲一邑之累幸賴同志摭摭編摩約略成書至於徵文考獻筆削攸嚴於將來博雅君子有深望焉

修志姓氏

總裁

江南池州府知石埭縣事廣東惠州府歸善縣姚諱子莊

編纂

江南池州府石埭縣儒學訓導淮安府山陽縣周諱體元

同修

江南松江府華亭縣沈麟

江南松江府上海縣陳王陞

江南池州府青陽縣甯峒

石埭縣志

姓氏

十六

本邑較訂

貢生

桂舉

瓚城

蘇湯

岱鉉

沈永年

曹繼參

生員

陳陳

陸鉛

蘇于  
曉泗

畢天輝

蘇汝霑  
陳啓運

蘇應樾

耆民

蘇揚張仁畢挺方禎施舜  
蘇 吳

督刊

江南池州府石埭縣典史直隸順天府涿州徐諱應桂